

光緒山西通志

鄉賢錄十三

錄二之十三

山西通志弟百二十八

賜進士出身頭品頂戴兵部侍郎兼都察院右副都御史巡撫山西提督軍務臣張爾琿

旨監修

明 洪武至天順

郝鵬徐溝人洪武十八年以歲貢入太學授戶部檢校歷郎中清湖廣參政入爲戶部右侍郎晉南京戶部尚書性儉朴官卿貳猶大布衣所居廳事卽前爲諸生時所處也恭謹自飭言動不苟中外皆有能聲當世羣以公輔推之

仇敬曲沃人元季同郝修已隱紫金山潛修砥厲洪武三年鄉試第一登進士授綏德知州政通民和百務具舉升鞏昌知府建學校振士風歷有成勩丁外艱卒於苦次子基以布衣薦舉官高麗平泉知縣

郝修己曲沃人洪武九年舉明經任戶科給事中改朝城縣知縣操持清介致政歸朝廷嘉其廉謹擢刑部郎中賜紫金山一區今名郝家山子孫世居焉

劉平翼城人洪武間由薦舉任江西宜黃知縣負擔至任廉介有政聲職滿歸邑人爭送之平曰昔負擔來今負擔去宜也何用送爲永樂間起辟不就卒子元貞居喪哀毀踰禮廬墓三年詔旌其門

袁泰萬泉人洪武辛亥進士授湖廣邵縣訓導升鉛山縣丞清慎愛民邑賴以安又崇文術興學校後改丞羅山益著政聲十八年升試都察院右僉都御史明年轉左二十三年升左副都御史泰爲人才辯明於法律有能名以鞠王爵獄頗煅鍊爲御史夏長文所劾上以老特宥之二十四年升右都

御史尋掌院事奉命同六部翰林院參看歷代禮制更定衣冠服食器用制度次年以憂去官卒於家泰處心廉慎執法不移理枉伸冤祛除民害當太祖開國初用重典繩臣下泰據理法爭甚力多所保全及卒太祖悼之遣使致祭

趙肅字玉鉉蒲州人洪武庚午舉人授汧陽訓導汧陽故隴西地俗多獷悍諸生率弧矢自雄肅至嚴爲科條以身表率踰年士風丕變秩滿調三河丁內外艱補滑縣所至皆飭教法如汧陽時正統元年致仕歸卒年八十一薛文清公爲之誌又漢中同知王聚淮安同知李威白水丞謝伯榮上林錄事賈教俱賢而壽至正統間始歿當時以生同時壯同仕老同歸砥礪名節保全終始稱爲河東五老監察御史謝琚有五老傳謂中條有五老峰實鍾生賢詰云

任毅長子人洪武二十七年以貢署蘇州知府歷重慶開封二府入爲工部左侍郎謫本部主事遷員外郎中致仕歸毅風姿俊偉學問贍博三守大郡俱著偉績及入爲卿貳聲望益峻降謫後日夜勤其職告歸優游林泉識者尤推服焉李達屯留人以貢士歷仕福建道監察御史秉公執法人不敢干以私軍民畏服時有鐵面御史之稱

杜敷字致道壺關人舉元鄉試第一除高平教諭遷臺州學正歸家教授通易詩書三經自號拙菴老人洪武十三年罷中書省其職掌於六部十四年詔舉賢才戶部尙書范敏舉敷及杜佑等召至告之太廟以爲四輔官敷主夏官攝秋冬官兼太子賓客位公侯伯都督之次屢賜敕諭隆以坐論之禮命協贊政事均調四時又賜敕嘉勉敷薦宋訥任國子助

教訥後卒爲名臣敦致仕歸卒著有四輔集行世

暴昭潞州人

舊志作浮山人

洪武中由國子生授大理寺司務三十

年擢刑部右侍郎明年遷左都御史尋改刑部尙書耿介有峻節布衣麻屨以清儉知名建文初充北平採訪使具得燕邸不法狀密以聞請預爲備燕兵起設北平布政司於正定昭以尙書掌司事與鐵鉉輩悉心經畫諸軍敗召歸金川門陷出亡被執不屈磔死

國朝賜謚忠烈

栗恕長子人洪武七年以才猷學術應辟召累官吏部尙書恕幼負異質有學識當元季閉戶深居常有澄清志晉掌銓衡甄拔士類拯濟時艱海內翕然以公輔推之後徙居會甯通顯累世

連楹字子聰襄垣人肇孫幼孤性極孝奉母訓讀書山中日炊米一勺刻厲進修舉洪武甲子鄉試授翰林檢討轉春坊改御史糾彈無所避因專其任歷六七考不調靖難兵起與同列姚鏞相誓糾察大小臣工有懷二心者露章彈之及金川門不守猶以大義抗諫遂就死當時死節諸臣多遭夷族其親族皆變姓名隱匿去逮禁弛稍稍復業歛衣冠而葬之國朝賜謚忠烈

辛彥博汾州人初名彥德洪武中貢入太學爲高皇帝所知賜今名蓋以潞公相期也旋授監察御史秩滿遷授浙江按察司使以註誤左遷尋擢都察院右僉都御史改詹事府詹事上書忤旨又以保舉違例再調繼仍遷浙江按察司使永樂初以擅責指揮陳仲禮謫戍興州未幾召還復除監察御

史補福建布政司參議佺送瓜哇使臣赴行在帝顧謂廷臣曰是老實先帝所嘗器重者特授浙江左布政使賜鈔五十錠彥博叩頭謝因乞省墳墓得旨馳驛歸後卒於任所彥博居官四十年持守清正不營田宅及喪歸子孫貧甚鄉人言爲官清苦者必以彥博稱首云

張傑平遙人洪武丙子舉人性端嚴言動不苟初授磁州判官以廉能著入爲左春坊司直郎侍皇太子讀書朝夕勸導以聲色寶玩最易喪志出入起居防範尤密上聞賜荆杖勞之未幾謝事去後屢行徵辟卒不起

王仲達澤州人洪武二年以孝廉舉知中江事秩滿乞還養親承樂初復去入仕堅志乞養如初上賜敕獎諭給鈔錠以歸

茹太素澤州人洪武三年鄉舉上書稱旨授監察御史六年擢四川按察使以平允稱七年召爲刑部侍郎上言御史未有定考宜令守院御史一體察核檢覈天下錢糧請增置磨勘司官吏各分爲科省衛會議軍民事請用按察司一員糾正皆從之尋降刑部主事陳時務累萬言上令中書郎王敏誦而聽之中言才能之士數年來幸存者百無一二今所任率迂儒俗士上召太素面詰杖之次夕復令人誦得其可行者四事因令中書定奏對式俾無繁文摘太素疏中可行者下所司上自序其首頒示中外十年遷浙江右參政尋賜侍親十六年召爲刑部試郎中一月遷都察院僉都御史俄降翰林院檢討十八年擢戶部尙書太素抗直不屈屢瀕於罪上時宥之嘗宴便殿賜酒曰金杯同汝飲白刃不相饒太素

叩首續韻曰丹誠圖報國不避聖心焦上爲測然未幾謫御史復坐詹徽事與同官繫足治事後坐法死

張曷澤州人洪武中舉人材累官工部右侍郎建文初議藩更置守臣乃以曷爲北平布政使而以謝貴爲都指揮使並受命密伺察燕事至則王稱疾久不出謀甚祕曷知必爲變乃部署在城七衛及屯田軍士列九門防守建文元年七月六日逮燕府官校王僞縛官校置庭中將付使者紿曷貴入至端禮門爲伏兵所執曷及貴不屈死後金川門敗族曷家焚殺其近戚程亨等永樂初嘗夢被髮爲厲出其尸焚之面如生正德中知州馬如驥立祠祀之

國朝賜謚忠烈

楊砥字大用澤州人洪武末由進士授行人司右司副上疏

言楊雄爲莽大夫而董仲舒天人三策及正誼明道之言其
翼世教今孔廟從祀有雄無仲舒非是帝從之厯官湖廣布
政司參議建文中言帝堯之德始於親九族今宜惇睦諸藩
無自翦枝葉不省父喪廬墓成祖初起鴻臚寺卿乞終制服
闋擢禮部左侍郎坐巡視河渠降工部主事改禮部厯北京
行太僕寺卿兼苑馬寺吳橋至天津等衛大水決隄請開德
州東南黃河故道及土河以殺水勢上命工部侍郎藺芳經
理之又請令民五丁養種馬一匹每十匹立羣頭一人五十
馬立羣長一人養馬家歲蠲租糧之半而薊州以東至山海
諸衛水草豐美其屯軍人養馬種馬一匹租亦免其半命軍
租盡蠲之餘從其議於是馬大蕃息砥剛介有守尤篤孝母
喪哀毀卒

侯復應州人洪武丙子舉人授國子監監丞遷翰林院編修
仍兼監丞事尋晉國子監司業前後三歷國子正身率物人
士翕然宗之

田炯大同人洪武中起家太學生游歷中外勤慎簡約後官
吏部左侍郎銓選精當有山巨源遺風

高巍遼州人尙氣節能文章母蕭有痼疾事奉無少懈母卒
廬墓三年洪武中旌孝行出太學生試前軍都督府左斷事
疏墾河南山東北平荒田又條上抑末技慎選舉惜名器數
事上嘉納之尋以決事不稱戍關索嶺特許代役曰以旌孝
子建文初歸遼州知州王欽應詔辟巍巍因上書曰賈誼有
言欲天下治安莫如眾建諸侯而少其力與裁制諸侯之良
策也今盡師其意勿行晁錯削奪之謀而效主父偃推恩之

策命秦晉燕蜀子弟分王於齊兗吳楚湘潭齊兗吳楚湘潭子弟分王於秦晉燕蜀其餘甯遼谷代慶肅等比類而分王之如此則藩王之權不削而自削矣又臣願益隆親親之禮歲時伏臘使人餽問賢者下詔褒賞之驕逸不法者初犯容之再犯赦之三犯不改則告太廟廢處之豈有不順服哉上領之已而燕兵起從李景隆出師參贊軍務魏復上書言臣願使燕曉以禍福感以親親之誼令休兵歸藩上壯其言許之魏至燕自稱國朝處士高巍再拜上書燕王殿下天子嗣位布維新之政天下愛戴皆曰內有聖明外有藩翰成康之治再見於今矣不謂大王顯與朝廷絕張三軍抗六師臣不知大王意何也今在朝諸臣文者智輳武者奮勇執言仗義以順討逆勝敗之機明於指掌皆云大王藉口誅左班文臣

實則吳王濞故智其心路人所共知魏竊恐奸雄無賴乘隙
奮激萬一有失大王得罪名義矣今大王據北平取密雲下
永平襲雄縣掩正定雖易若建瓴然自兵興以來業經數月
尙不能出蓐爾一隅地且大王所統將士不過三十萬以一
國有限之眾應天下之師亦易罷矣大王與天子義則君臣
親則骨肉尙生離間況三十萬異姓之士能保其同心協力
效死於殿下乎魏每念至此未始不爲大王灑泣流涕也願
大王信魏言上表謝罪再修親好朝廷鑒大王無他必蒙寬
宥太祖在天之靈亦安矣儻執迷不悟舍千乘之尊捐一國
之富恃小勝忘大義以寡抗眾爲僥倖不可成之悖事魏誠
不知大王稅駕也況大喪未終毒與師旅其與秦伯夷齊求
仁讓國之義不大逕庭乎雖大王有肅清朝廷之心天下不

無篡奪嫡統之議卽幸而不敗謂大王何如人魏白髮青生
蜉蝣微命性不畏死洪武十七年蒙旌孝行魏竊自負旣爲
孝子當爲忠臣死忠死孝魏自願也如蒙賜死獲見太祖在
天之靈魏亦可以無愧矣書數上皆不報已而景隆兵敗魏
拔舍南歸至臨邑遇參政鐵鉉相持痛哭奔濟南誓死拒守
屢敗燕兵及金川門啟魏自經死驛舍

國朝賜謚忠節

龐清武鄉人洪武乙丑進士任監察御史嘗被召赴稍遲上
詰之對曰送父還鄉上使追之至則儲錢數貫蒜一連而已
上笑曰汝名清可謂不愧厥名矣御書惟清二字賜之升揚
州知府

閻察平定人洪武乙丑進士授禮科給事中改監察御史遇

事敢言然不微訐爲名高太祖甚器之嘗榜所言事於本州儒學爲諸生式出爲浙江布政司左參議中使銜命至恃勢凌轢察曰我朝廷方面官今爲中使辱何顏復收吏民因繫諸獄擊殺之而以其狀上太祖驚曰壯士勅左右勿問尋擢左布政使以議事召還卒於邸賜祭葬有加

王希曾靜樂人洪武丁卯戊辰聯雋進士累官都察院副都御史開國初太祖御臣下頗用重典少愆輒置於法希曾獨以秉直不回始終恩禮不替

劉圓僧定襄人洪武中以學行舉授翰林院洗馬侍皇太子讀書執坐講之禮侃侃數百言不止後以櫻目疾請致仕詔賜金帛歸

齊麟五臺人洪武乙丑進士殿試二甲第一入翰林爲編修

累官禮部右侍郎稱理學名臣

王翰字時舉前夏令仲文子仲文居官以廉稱既致仕貧不能歸遂爲縣人翰少孤鬻薪自給適浚儀歸陽寓於夏諸名士從之遊翰時時來竊聽陽門人郭極怪之旣知爲令子引以見陽遂得受業門下學成後結廬中條山有所得取落葉書之或風起輒飄澗谷中樵蘇者得之按節高歌聲震金石洪武間以經明行修辟爲本縣學訓導改平陸還鄆陵教諭所至皆有教法永樂初周王聞其才乞爲教授王素驕縱多不法翰數諫不聽因佯狂去久之薦爲翰林編修已復以用邸事調廉州教授倭寇數千人破城率諸生巷戰死之翰性好聚書所得俸錢悉捐以市不足輟衣食費足之故所藏經史子集至數千卷山居時有山林樵唱集在鄆陵有敝帚集

在周邸有梁園寓稿于礪字汝用幼嗜學登永樂乙未進士官工部主事遷遼府長史以諫謫蒙陰知縣既歸教授鄉里以老著有荆南詠聽椿吟稿

杜佑安邑人洪武十四年戶部尙書范敏薦之召爲四輔官佑主春官兼攝秋冬禮遇與杜敏同後罷去是官遂廢不復設佑嘗三主本省布政司鄉試稱得人

薛賓一名貴夏縣人洪武間貢士累官刑部右侍郎建文嗣位改北平布政司左參政燕邸有異謀同左布政使張昺密以其狀上擬先發制之小吏季有直洩其事燕邸謀益亟而賓固不知也適入見被執賓抗辨不服燕邸以金瓜擊之落其齒遂與昺俱見殺時有李指揮者匿賓幼子爲已嗣後邑人郭成官司務訐其事因俱罹禍蔓延甚眾

趙玘字雲翰夏縣人僑祥符洪武中舉鄉試入大學使山東
稱旨賜襲衣楮幣尋授兵部職方司主事圖天下要害阨塞
屯戍所宜以進帝以爲才遷武庫員外郎建文初遷浙江右
參政策捕海寇有功成祖時使交趾卻其餽擢刑部右侍郎
改工部再改禮部進尙書賜宴華蓋殿仍撤膳羞遺其母尋
命詣北京營仁孝皇后山陵以朝鮮使臣賜賚下獄尋得釋
督建隆慶保安永甯諸州縣撫綏新集民安其業還改兵部
尙書母艱起復專理塞外兵事帝北征轉餉有方仁宗初改
南京刑部尙書宣德五年致仕正統元年卒年七十三玘性
精敏厯事五朝位列卿自奉如寒素然

蘭芳夏縣人洪武中舉孝廉爲刑部員外郎遷郎中永樂中
出爲吉安知府寬厚廉潔民甚德之吉水民詣闕言縣有銀

礦道官覆視父老遮芳訴曰聞宋季嘗有言此者卒以妄得罪芳詰告者得實具奏同官不肯署名芳請獨任之奏上帝曰吾固知妄也事得寢已坐事謫終事官從宋禮治會通河復爲工部主事十年河決陽武遣芳復按視芳言中鹽隄當暴流之衝請加築塞又言自中灤分導河流使由故道北入海誠萬世利又言新築岸埽止用草索不能堅久宜編木成大困貫椿其中寔以瓦石復以木橫貫椿表率築隄上則殺水固隄之長策也詔悉從之其後築隄者遵用其法以宋禮薦工部右侍郎行太僕卿楊砥乞開德州良店東南黃河故道復命芳往治之所經郡邑有不便民者輒疏以聞仁孝皇后將葬治道路供頓訖卒於官

史誠祖解州人洪武末詣闕陳鹽法利弊上納之授汶上知

縣爲治廉平寬簡永樂七年成祖北巡遣御史考覈郡縣還
言誠祖治第一賜璽書勞之曰守令承流宣化所以安利元
元朕統御天下夙夜求賢共圖治理往往下詢民間皆言苦
吏苛急能副朕心者實鮮爾敦厚老成恪共乃職持身勵志
一於廉公平賦均徭政清訟簡民心悅戴境內稱安方古良
吏亦復何讓特擢爾濟甯知州仍視汶上縣事其益共乃職
慎終如始以永嘉譽欽哉并賜內醞一尊織金紗衣一襲鈔
千貫誠祖旣得旌益勤於治土田增闢戶口繁滋益編戶十
四里成祖過汶上欲徙其民數百家於膠州奏免之屢當遷
職輒爲民奏留閱二十九年竟卒於任士民哀號留葬城南
歲時奉祀

高鐸字鳴道絳州人從李彥英遊與陳行義共朝夕學益進

洪武甲子舉鄉試第一登甲戌進士累官刑部侍郎調僉都御史舉師李彥英爲平陽絳州訓導友陳行義爲蘇潁知州督築留都城開三山街又奏遷金城驛爲侯馬驛卒贈尙書田深稷山人洪武甲子舉人拜福建道監察御史風裁凜然廉譽丕著出爲長葛知縣不肅威嚴以惠德化民考績改知保定縣葛民赴闕奏留復任九載升許州知州惠愛廉平人歌來暮焉

趙朗垣曲人洪武乙丑進士授浙江道御史摘伏發奸風裁峻厲朝廷重之呼爲長御史

石堅絳縣人洪武中以貢生任齊河縣典史擢行人司行人負忠義饒膽略永樂時高麗不庭抗疏請往平之上問計將安出對曰兵難遙度陛下第命臣臣必有以復陛下上奇其

言遂以高麗事付之堅單騎往面其主宣布朝廷威德高麗王笑謂子一人至吾國何敢大言堅曰固知若必殺我但與師來勦若輩不爲齋粉乎高麗王拜服卒不煩一兵以片言警屬國使奉正朔還授按察司副使

周正霍州人洪武間貢任福建道監察御史升貴州按察司僉事察吏精嚴彈舉允當風聲所至莫不震懾在貴州地僻山險人多不馴正隨在訓化俗爲丕變焉

陳琦霍州人洪武丁卯舉人授厯城教諭嚴正有師範遷國子監助教再遷和州知州布德施教男女異路囹圄空虛遷長史致仕歸享年百有七歲

以上洪武年

張旗榆次人永樂時知安邱縣會妖賊唐賽兒等攻安邱旗與縣丞馬搆率民兵八百以死拒戰賊敗復集眾攻城會衛

青兵至旗出城中兵合擊大敗之卒全安邱事聞擢山東參政

王錫翼城人永樂戊子舉人授鄆縣教諭教條詳盡人文競起擢行在戶科給事中正色立朝累官通政司右通政忠誠廉正爲朝廷尊禮事詳名臣錄

仇鎮汾西人永樂丁酉舉人知膠州恭儉和平化民以德州負租鎮奏得免升贛州知府去之日行李蕭然民立祠祀之戴麟字仲仁翼城人永樂庚子舉人授莘縣知縣有惠政考績當遷慨然曰大官以見志耳久僕僕何爲遂致仕歸民爲立祠

馮受吉州人永樂間舉賢良方正授河南杞縣丞陳侍郎某以才政薦于朝擢永興知縣歷秦安醴泉華陰胥有政聲景

泰初卒士民哀思立祠華山之麓

張福蒲州人永樂庚子舉人授鞏昌府教授淹貫經史勤於訓迪人材多所造就升國學助教後升山東平度知州律已廉介鋤強扶弱稱循吏尋升大名知府卒於官平度民詣闕求立祠報功制定祭儀春秋祀之子侃景泰癸酉舉人授西安同知升鞏昌知府招撫勞來嘉意綏輯歲祲蠲稅發賑禱祀祈霖民不爲災進階亞中大夫

趙泰字熙和潞城人永樂中由舉人入監歷事都察院授常州府同知有廉惠聲濬孟潰得勝二河作魏村閘諸所興築民無言勞者周忱與況鍾議減重糧泰亦檢常州官田租請並減之遷工部郎中命塞東昌決河忱薦爲協同都運益勤其職尋卒

李彝渾源人永樂甲午舉人授監察御史以剛直有聲臺中
後歷江西按察使治獄明恕遷浙江布政使益厲素節出納
錙銖必謹尋卒於官

張羽山陰人永樂庚子舉人授廣西道御史持已嚴正彈劾
不避改龍泉縣知縣尋以親老乞休

寇謙應州人永樂中授戶科給事中時相頗專擅方得上寵
謙抗章糾之風生朝宁

郭頤應州人永樂中貢生由知縣擢監察御史出按京畿文
皇帝北征抗疏力爭後復屢疏言事朝右咸側目遂拂衣歸
孫靖平定人永樂癸卯舉人任鴻臚序班升都督府都事以
言事忤石亨調四川渠縣有惠政卒於官渠人立祠祀之
孫琦字叔閭孟人永樂甲辰進士試湖廣道御史清理刑獄

山西通志卷一百二十八 雜錄十三
未百日拜交趾道御史出按南甸彈劾百餘人三年代還條
奏所見便利事改山東道御史琦剛直敢言然忠厚持大體
嘗曰御史雖司糾察若推求細故以枉無辜則亦非朝廷設
官本意久之轉江西按察司僉事擢工部右侍郎遷左侍郎
改左副都御史奉勅審錄江南舟次河西遘疾有旨歸就醫
藥卒賜祭葬如例

耿九疇字禹範平定人僑盧氏永樂末進士宣德六年授禮
科給事中議論持大體有清望正統初推擇爲兩淮鹽運司
同知痛革宿弊條奏便宜五事著爲令母喪去場民數千人
詣闕乞留起都轉運使廉聲益振婦孺皆知其名以事誣逮
得白卽留爲刑部右侍郎屢辨疑獄無所撓屈禮部侍郎章
瑾下獄九疇議貶其官給事中論刑部不公瑾卒如奏巡視

鳳陽奏留英武飛熊諸衛軍耕守招來流民七萬戶境內以
安自九疇去鹽政復弛景泰元年仍命兼理尋勅錄諸府重
囚平反多釋旋兼撫江北諸府代還改撫陝西劾都指揮楊
得青等私役操卒詔按治邊將請增臨洮諸衛戍九疇言邊
城士卒非乏將帥能嚴紀律賞罰明信則人人自奮不然徒
冗食耳乃不增戍又言邊將所以禦寇衛民也今使民避寇
失業安用將帥因禁民入徙有被寇者治守帥罪四年轉右
副都御史大臣鎮守巡撫皆授都御史自九疇始有旨市羊
角爲燈引宋蘇軾諫買浙燈事事乃寢災異求言請延儒碩
公賞罰擇守令簡將帥優詔報焉天順初議事京師上顧侍
臣曰九疇廉正人也留爲右都御史請繫都察院獄者給米
乃日給一升遂爲令又陳時弊五事皆嘉納之御史張鵬等

山陰通志卷一百一十八 列傳第十三
十四
劾石亨曹吉祥亨等謂九疇實使之遂并下獄謫江西右布政使尋調四川明年禮部缺尙書李賢曰老成清介無如九疇乃召還既至憐其老改南京刑部尙書四年卒謚清惠子裕

姜濤字伯源忻州人永樂甲午舉人除嘉興府同知代還督工口外補河間府同知未幾守以事罷民爭走闕下祈濤知府事遂授知府值外艱民復走闕下祈留任遷順天府府尹時祀典牲醴諸費悉供自民間濤請出庫錢供役先是濤赴京時有王同知者與有隙王死妻子以事械入京師濤聞飲食之待有加禮又前督工時有舊官按察者在役亦與隙見濤恐懼不敢前濤與執手道殷勤如平生人皆稱其長厚遷戶部侍郎以疾歸未幾起督漕運倉儲卒於官濤爲人清介

雖貴顯家無中人產卒之日不能具棺斂云

楊甯忻州人永樂乙未進士授戶部主事升本部郎中有清節及卒止遺銀帶一圍子敦尚氣節正統間進士授雲南道御史以直言左遷新都縣有治稱孫玠有孝行

韓士奇繁峙人永樂庚子舉人歷陝西分巡關內道天順間賊首定山等嘯聚圖攻漢中士奇募兵礪器潛伏要地故梳洗橋西岸下候賊半渡縱兵擊之賊大潰生擒定山黨屬五百餘賊遂平以薦升副使

弋謙代州人永樂九年進士除監察御史出按江西言事忤旨貶峽山知縣復坐事免仁宗素知謙骨鯁召爲大理少卿直陳時政多見納既復言事太數上不憚尙書呂震等因劾謙誣罔都御史劉觀令眾御史合糾謙上召楊士奇語以謙

之逾分士奇曰謙不諳大體有之然心感超擢恩欲圖報耳
主聖則臣直惟陛下優容之上乃不罪謙然每見謙詞色甚
厲士奇嘗從容言陛下詔求直言謙言不當觸聖怒外廷悚
惕以言爲戒今四方朝覲之臣皆集闕下見謙如此將謂陛
下不能容直言矣上惕然曰此固朕不能容亦呂震輩迎合
以益朕過遂免謙朝參令轉視司事言事者益少上復召士
奇曰朕怒謙矯激過實耳朝臣果月餘無言爾語諸臣白朕
心士奇乞親降璽書遂引過諭百官無以謙爲戒而復謙朝
參已而中官採木四川貪橫召謙諭曰爾清鯁爲朕往治之
擢副都御史賜鈔以行遂罷採木之役宣德初爲交趾右布
政使王通乘交趾謙亦論罪正統初釋之土木之變謙布衣
赴闕下薦通及甯懋阮等十三人皆奇才可用廷臣奏留謙

不報景泰二年復至京疏薦通等于謙奏錄通等命謙代臣
總軍務不許罷歸卒

張隨字子貞芮城人永樂丁酉解元官戶部主事廉介自持
甘清苦宣廟微行幸其第見隨躬親汲水其妻舂簸甚嘉歎
之後以部事坐法上曰此清主事也勿問後改工部辭疾乞
歸三十餘年清修無異寒士

郭齡夏縣人永樂丁酉舉人授廣安知縣威惠有聲九載升
重慶知府洞蠻叛逆官軍屢征不下齡毅然請往諭以朝廷
恩信眾皆帖服留三載臨行饋金萬鎰卻弗受時重慶三年
不雨齡回任至界卽雨穀秀雙歧人心感悅後升參政兩任
俱有去思碑立祠祀焉

李適字九達芮城人永樂庚子舉人任順德府通判會亢旱

去冠服跣足徒步禱雨未及歸大雨饒洽秩滿升保定府同知能聲益著後乞歸父母尙康壽鄉人榮之

王彬絳縣人永樂丙戌進士任直隸興濟縣知縣時運河衝決城郭漂搖久難葺理彬臨河歎曰天欲窮吾民何如溺我卽投身於河門役挽帶隨之越明日漂尸于縣堂冠帶整齊士民哀而立祠歲時祭禱

薛瑄字德溫河津人性類敏年十二能爲詩賦父貞任玉田教諭永嘉徐懷玉高密魏希文濟南王素亨海甯李大亨范汝舟皆元耆儒僑北土貞竝禮爲瑄師由是得聞洛閩之學乃盡焚所作詩賦專意講肄後貞改官鄆陵鄆陵諸生多模陋乃命瑄補鄆陵學生永樂十八年遂舉河南鄉試第一明年成進士以省親歸居父喪悉遵古禮宣德中服除授御史

三楊欲見之謝不往出監湖廣銀場日探性理諸書學益進以繼母憂歸正統初遷朝尚書郭瑾舉爲山東提學顛事首揭白鹿洞學規開示學者延見諸生親爲指授才者樂其寬而不才者憚其嚴皆稱薛夫子王振語三楊吾鄉誰可爲京卿者以瑄對召爲大理左少卿三楊欲瑄一往見振俾李賢語之瑄正色曰拜爵公朝謝恩私室吾不爲也其後議事東閣公卿見振多趨拜瑄獨屹立振趨揖之瑄亦無加禮自是銜瑄指揮某死妾有色振從子山欲納之妻不肯妾遂訐妻毒夫下都察院訊已誣服瑄及同官辨其冤三卻之都御史王文承振旨誣瑄故出人罪振復譖言官劾受賄下獄論死瑄繫獄讀易自如子三人願一子代死二子充軍不允及當行刑振蒼頭忽泣於幾下問故泣益悲曰聞今日薛夫子將

刑也振大感動會刑科三覆奏兵部侍郎王偉亦申掾乃免
刑久之釋還景帝初用給事中程信薦起大理寺丞額森入
分守北門有功尋出督貴州軍餉事竣卽乞休學士江淵奏
留之景泰二年推南京大理寺卿富豪殺人獄久不決瑄執
寘之法召改北寺蘇州大饑貧民掠粟火富豪居寘海濱王
文以閣臣出視坐死者二百餘人瑄力辨其誣文憲曰此老
倔強猶昔然卒得減死屢疏請老不許英宗復辟用楊善薦
拜禮部右侍郎兼翰林院學士入閣預機務王文于謙下獄
下羣臣議瑄力言於上獲減一等上數召見瑄所陳皆關君
德事已見石亨曹吉祥亂政歎曰君子見幾而作不俟終日
吾可久居此乎疏乞骸骨許歸瑄學一本程朱其修己教人
以復性爲主充養達密言動威可爲世法嘗曰自考亭以還

斯道已大明無煩著作直須躬行耳有讀書錄二十卷平易簡切皆自言其所得學者宗之天順八年六月得疾賦詩曰矮房紙帳竹屏風睡覺東窗日已紅七十年來無一事此心惟覺性天通危坐正寢而逝年七十有六贈禮部尙書謚文清宏治時給事中張九功請從祀詔祀於鄉已給事中楊廉請頒讀書錄於國學俾六館誦習且請祠名賜名正學隆慶六年詔從祀大成廟庭

以上永樂年

周瑄字廷玉陽曲人由宣德乙卯鄉舉入國學正統中除刑部主事善治獄北征當扈從者多託疾瑄請行遂被創歸擢署郎中校尉有受賊縱盜以警人代者瑄辨雪之抵校尉罪外郡送囚一日至八百人瑄慮其觸熱三日決遣殆盡景泰元年以尙書王直薦超拜刑部右侍郎賑順天河間饑英宗

復辟命遍歷所部大舉荒政先後賑饑民二十六萬五千給牛種各萬餘奏行利民八事官刑部久屬吏不敢欺而意主寬恕與同官孔文英竝稱長者成化改元遷右都御史督理南京糧儲捕懲作奸者數輩宿弊爲清言鳳陽徐淮饑發廩四十萬以賑久之遷南京刑部尙書令事不須勘者毋出五日獄無滯囚暑疫悉遣輕繫者曰召汝則至囚歡呼去無失期爲尙書九載屢乞休久乃得請家無田園卜居南京卒贈太子少保謚莊懿長子經別有傳次子紘成化進士爲南京吏科給事中兩以災異言事竝嘉納閱軍爲中官蔣琮誣奏貶南京光祿署丞終山東參議

耿純曲沃人宣德王子舉人授國子監學錄升大名通判以通詩經名有詩對編韻行世子文聰舉人官同知文濟進士

官主事累陞參議

毛俊太平人宣德間貢士任兵部主事改工部材幹敏捷處
煩劇措置有法韓王請廣居第俊奉命至平涼經營相度王
與民均得其便又嘗建襄陵樂平二邸費不及奢勞不至擾
當時尤稱重之

劉昭字克明潞州人宣德丁未進士正統間擢南給事中糾
舉秉公不避權要除宦官監收倉糧之害奏嚴皇城門禁以
大臣薦知臨洮修學宮闢荒蕪捐俸賑饑平反冤獄臨洮人
士作歌頌之

侯璉字廷玉澤州人慷慨有大志登宣德二年進士授行人
烏撒烏蒙爭地詔遣璉諭解之正其疆里而還副寺郎章倣
使交趾關門卑先驅請偃而入璉叱曰此狗寶耳土人由之

固當奈何辱天使交人爲毀關乃入及歸餽遺無所受御史
劉濱醕酒璉劾黜之遷兵部主事正統初從尙書柴車出鐵
關禦阿台有功進郎中從王驥征麓川至金齒遣援大侯州
賊眾三萬至都督指揮馬讓盧鉞擊走之遂由高麗貢山兼
程夜行會大軍壓其巢麓川平以功拜禮部右侍郎出鎮雲
南驥再討麓川復以功遷左召還尋調兵部十一年復鎮雲
南驥南征思機發璉破之鬼哭山璉書褒賚景帝初命總督
貴州軍務討苗韋同烈時副總兵田禮已解新添平越圍璉
遂遣兵攻敗都盧水西諸賊水西道始通又調雲南兵由烏
撒會師開畢節諸路檄普安土兵援安南衛而自率師攻破
柴塘彌勒等十餘寨會賊復圍平越回師擊退之遂分哨七
盤坡羊腸河楊老堡解清平圍東至重安江與驥兵會與隆

抵鎮遠進兵部尙書擒改賞僞王王阿同并其黨三十四人
別賊阿趙掠清平復討擒之水西苗阿忽等六族乞歸化詔
隨方處置以勞瘁卒時景泰元年八月也賜祭葬蔭其子錦
衣衛世襲千戶

石瑄字信之應州人數歲知孝友父嘗有疾灼艾於腹瑄亦
取艾灼其腹曰吾不忍父獨痛苦也父嘗爲瑄置衣瑄曰兄
長於我請先爲兄製嘗踰戶限衣絰而止兄戒以緩步瑄跪
謝父兄皆奇之領宣德己酉鄉試癸丑進士正統初授禮科
給事中擢金華知府鄰郡盜起出兵擊之民避盜來者千百
爲羣乏食瑄欲開庾以濟上官難之瑄曰被迫於殍死則亦
爲盜矣擅開庾與迫民爲盜罪孰重竟開庾以濟蘭谿吏徐
世揚浦江卒王猛烈皆爲邑害瑄置之法眾爲歌謠頌之母

山西通志卷一百二十一 雜錄
憂去都御史軒倪言於朝起原官尋陞福建右布政使入覲
福州守雷碩疇以金峻卻之上聞其賢以爲南京禮部左侍
郎未幾召爲禮部尙書靖共於位朝望益孚甫一載而卒年
六十有四

米璫山陰人宣德乙酉舉人端嚴有操行授慶陽府同知遷
南京戶部郎中清苦如諸生艱歸鬻產營葬起補永平府知
府所得俸錢蠲賑饑民外悉分給宗族郡大璫曹某數來關
說面拒之不少徇卒後人相傳爲神云

李素安邑人宣德庚戌進士性剛直累擢通政司通政官官
馬順恃寵而驕素當御前力斥其奸英廟異之

史宗禮字文博解州人誠祖孫宣德王子舉人狄道知縣公
正廉勤考績升瑞州府通判還本府知府剛介不阿致仕歸

瑞州士人千餘保留於朝年八十七卒

史濡霍州人宣德己酉舉人初任陳留縣教諭擢江西道監察御史尋升廬州府知府持身清謹勤政惠民中官王振欲其附已啖以美官卒不往見當時人稱不見振者薛瑄與濡而已

以上宣德年

王永壽字延齡太原人正統間以舉人任饒州府推官擢廣西道監察御史嘗從北征凱還受賚巡按山東貴州蘇松等處累升工部尙書巡撫湖廣兼督軍務征銅鼓五關等苗有功賜從一品俸天順初調南京卒官賜葬祭

古鏞祁縣人正統丙辰進士選翰林院庶吉士授大理寺評事出爲山東僉事治河張秋還本省按察使召補大理寺卿鏞深經術有幹濟才初官東觀以文章有名後涖臬司晉廷

尉平反冤獄與治河並爲世稱先是河決時患且及畿輔鑄至卽其形勢而疏鑿之不數月遂就故道今卽其地立祠祀焉

王福字崇善清源人幼穎異喜讀書正統戊午舉鄉試第一入國學祭酒李時勉深器重之乙丑成進士授監察御史照刷陝西三司文券遷順天府府丞轉府尹以幹濟稱值內艱遣官諭祭營葬事甫畢卽奪情復任力辭不獲在京兆十餘年彈治姦猾嘗自爲贊當世謂爲實錄焉

邢讓字遜之襄陵人年十八舉於鄉入監李時勉器之與劉珏齊名登正統十三年進士改庶吉士授檢討景泰初李實自衛拉還請再遣使迎上皇景帝不許讓上疏曰上皇於陛下有君之義有兄之恩陛下安得而不迎及今弗圖賊將假

大義以聞我因而入寇臣未知孰爲曲直也若從羣臣請仍命實齋勅以往具宜迎復之旨雖上皇還否未可必而陛下恩義之篤昭然天下矣苟迎而不許則我得實直於彼以興問罪之師不亦善乎上曲諭解之天順末未終父喪起修英宗實錄進修撰成化二年詔遷國子祭酒議慈懿太后祔廟讓率僚屬疏諫兩京國學教官例不得遷擢讓以爲言於是科目者得銓敘讓在太學以師道自任修辟雍通志督諸生誦小學諸經痛懲謁告時以此見稱而怨謗亦眾名位相軋者多忌之五年擢禮部右侍郎七年以在國子監用會饌錢事與後祭酒陳鑑等俱得罪諸生訴闕下請代復詔廷臣雜治卒坐罪贖爲民卒

趙偉字士奇潞州人正統戊午舉人授開封府同知巡撫于

謙薦知衛輝府未任艱歸補萊州府同知二年遷青州府知府值旱荒飛蝗蔽天禱於神大雨如注蝗盡斃民一家三人悉坐死擇其稍輕者活之使得有後蒞政八年壇壝廟學以次修舉後以朝會入都疏乞致仕優游里巷中歷十餘年卒子汝璋貢士官教授

王約甯鄉人正統中知定州持己以禮撫民以恩時官軍逐寇糧芻不給約設法厝置事濟而民不擾授浙江鹽運同知原傑字子英陽城人正統十年進士授南御史尋改北巡按江南捕誅劇盜復按順天諸府天水牧馬多斃傑請免責償而開中鹽引以賑饑爲部所格景帝卒從傑議超擢江西按察使劾甯王奠培革其護衛治行聞賜誥旌異遷山東左布政使成化二年就拜右副都御史巡撫其地歲凶賑救民無

流移召爲戶部左侍郎軍民鑿黃河淤地奸徒多獻王府傑
請獻者請戍并罪受獻者從之江西盜起以傑嘗再蒞其地
得民詔往治捕戮六百餘人餘悉解散改左副都御史還佐
院事荆襄流民數十萬朝廷以爲憂十二年命傑出撫徧歷
山谿宣朝廷德意諸流民願附籍於是大會湖廣河南陝西
撫按官籍之得戶十一萬三千有奇口四十三萬八千有奇
其無產及梗頑者驅還鄉而附籍者用輕則定賦民大悅因
相地勢以襄陽所轄鄖縣居竹房上津商洛諸縣道路四達
去襄陽五百餘里山林阻深猝有盜賊府難遙制乃拓其城
置鄖陽府以縣附之且置湖廣行都司增兵設戍而析竹山
置竹谿析鄖置鄖西析漢中之洵陽置白河與竹山上津房
咸隸新府又於西安增山陽南陽增南召桐柏汝州增伊陽

各隸其舊府制既定薦知鄧州吳遠爲鄧陽知府諸縣皆擇
鄰境良吏爲之流人得所四境乂安將還以地界湖廣河南
陝西事無統紀因薦御史吳道宏自代詔卽擢道宏大理少
卿撫治鄧陽襄陽荊州南陽西安漢中六府鄧陽有撫治大
臣自此始傑以功進右都御史請還朝會南兵部缺尙書以
傑任之疏辭不許遂卒於南陽年六十一鄧襄民爲立祠贈
太子太保謚襄敏錄子宗敏國子生

孫逢吉字餘慶渾源州人正統丁卯舉人授延長縣知縣植
善鋤強賢聲甲關中擢監察御史巡鹽長蘆監軍榆林所至
風紀肅然後復按四川江蠻內訌鎮巡不以聞特疏正其罪
救旱疫災蜀人有春雨和風之謠遷陝西僉事轉副使備兵
固原撫治屬番咸悅服晉右布政使遷左布政使引疾歸

喬毅字志宏樂平人正統辛酉舉鄉試第一戊辰成進士選翰林院庶吉士改吏科給事中轉刑科英廟復辟前後數上章言時政遷大理寺丞晉左少卿擢工部右侍郎督理漕運時淮陽亢旱水淺舟膠雖加疏濬卒不得進毅齋沐禱於神其夜潮水大至後陪祀山陵中道遘疾旣成禮遂不起毅性孝友母晚得痿疾衣服飲食悉手自奉之事兄恭謹如父居官不詭隨處僚友無機心自奉儉約雖履尊顯不改常度卒後賜祭葬如例子鳳進士官兵部郎中孫宇進士官吏部尙書

王正字嗣宗夏縣人翰孫礪子也幼聰穎過人登正統壬戌進士兄弟四人析居凡田廬器用悉推讓之授直隸安肅知縣招集流亡民皆復業安肅大治民設主祀之升大名知府

治行卓異部院識其名母喪歸民遮道泣送服除改知平涼府不畏權勢時韓王驕縱正每繩以法賊火滿之亂撫按檄督軍餉尋以父喪歸所著有公餘雅興牧民手鏡藏於家甯瑛稷山人正統壬戌進士授禮部主事尋擢湖廣布政司參議升參政時荆襄盜發上命將勦之瑛督餉不乏既平賜衣二襲

陶銓字文衡絳州人正統乙丑進士授行人奉命至太原會中官王振亦至聲勢煊赫銓不一往謁歷升陝西參議和平愷梯士民戴之致仕歸與鄉里耆碩爲九老延齡會有盜持炬入室見其所有惟敝衣舊書歎息去有司欲窮治銓曰彼以貧來置吾貧而去奚究焉其溫厚類如此

史素霍州人正統甲子舉人累官鎮江府知府政尙循良心

存剛介四任大郡一節不移課生徒以育材平賦役以惠下
不阿權貴奏復民田善蓄隄防治多美利

孫鏜字振遠東勝州人

案當作東勝衛

襲濟陽衛指揮同知朱勇薦

署指揮使正統末擢指揮僉事充右參將徐恭討葉宗留敗
賊金華復破之烏龍嶺景帝初召還起擢都督僉事典三千
額森入進右都督充總兵官統京軍一萬禦紫荊關而寇
已入遼營城外寇轉至西賊鏜與大戰斬其前鋒數人逐寇
北寇益兵圍鏜鏜力戰不解高禮毛福壽來援石亨兵亦至
寇乃退副楊洪追之戰涿州深溝頗有斬獲師還仍典營務
景泰初楊洪劾鏜江淵言城下之役惟鏜戰最力乃釋之三
年冬充副總兵協郭登鎮大同鏜欲與分軍子百戶宏侮登
上以鏜故贊之召還仍典三千營英宗初以奪門功封懷甯

伯予世秀天順初詔充總兵官帥京軍往甘肅將陞辭宿朝
房夜二鼓太監曹吉祥昭武伯曹欽反恭順侯吳瑾趨語鎧
鎧草奏自東長安門隙投入內庭始得集兵擊吉祥守皇城
諸門鎧走邀太平侯張瑾擊賊瑾不敢出倉猝復走宣武街
急遣二子輔軹呼征西將士給之曰刑部囚逸獄獲者重賞
眾稍聚至二千人始語之故時已黎明遂擊欽欽方攻門鎧
兵追擊賊散軹斫欽中膊軹亦被殺欽竄歸拒鎧力戰至晡
始定論功第一進世侯仍典三千營贈軹百戶世襲憲宗初
坐與牛玉婚聞住尋予半祿已全給之成化七年卒贈涑國
公謚武敏子輔請嗣侯吏部言奪門功例不得世傳上以鎧
捕反者予之傳子至孫應爵正德中總督團營四傳至曾孫
世忠萬厯中鎮守湖廣總督漕運凡二十年又三傳至孫維

甲申三月被殺

以上正統年

魏恭交城人景泰庚午舉人授渭南知縣調新安有爭訟者屢歲不決恭至一訊卽服獲盜乃自責曰此吾不能以德化民致然耳他盜聞之多改行爲善都御史王恕薦於朝升西安府通判改荊州府卒祀新安名宦

王璟陽曲人景泰癸酉舉人授濟南府同知擢本府知府遷布政司參政轉南京光祿寺卿璟事父母孝所得俸輒推以予昆弟居官所至俱有惠政在南都清望尤著卒贈工部侍郎

申綱陽曲人工詩文景泰癸酉舉人選監察御史有直聲出按河間等處奸貪屏迹厯知松江九江府家無厚產有故屬劉宇嘗餽以金峻卻之後宇爲冢宰寓書臺使者月餽錢米

亦卻不受

王鑑太原人景泰甲戌進士授御史嘗於左順門面斥中官非禮中官怒甚屬都御蕭維楨因考察去之維楨不從天順時彗星見鑑與同官十三人將劾石亨曹吉祥給事中王鉉洩於亨亨先與吉祥泣訴上前言鑑等結黨排陷明日疏入收疏首張鵬楊瑄悉召諸御史擲彈章俾自讀訖下獄撈掠遣戍會風雷雹災甚乃止貶鑑膚施知縣有善政憲宗初所司以治行聞擢延安知府陝西守臣亦上鑑膚施政績特賜敕褒之

因禮曲沃人景泰庚午舉人授武功訓導歷清澗禹城松江教諭純篤不阿居官有師範在武功時康海亟稱之在禹城與御史白行中善白欲囑當道尊禮之禮卒不許曰若何愛

我而點我乎在松江名士如錢福輩皆稱弟子錢溥贊詞有
日持三十年之教鐸布四學校之陽春子綱字叔大成化丁
酉舉人官滄州知州廉潔無欲時衣布衣後卒貧不能歸大
吏經紀其喪民爭歛錢賻之祀滄州名宦

衛英字時獻號箕峰洪洞人開州判官政子也景泰癸酉舉
人歷鳳翔正定府通判濟南府同知遷開封府知府請告歸
歸四年晉階亞中大夫致仕英少從劉編修授尚書有文名
事親孝父母沒廬於墓上年四十喪偶不再娶在鳳翔定饒
運均輸法在正定郡人尚書白聲勢赫奕英不往在濟南給
軍士餽餘羨七千兩悉歸之官民有田在白雲湖宗室奏奪
之英力持不與在開封地頻大河苦奔潰築隄障之郡人恃
以無恐又以徭役法未得其平悉心經畫爲條其便宜英家

居時有宅一區田三十畝涖官數十年未嘗稍有增益中丞張公疏稱廉如趙抃而少琴鶴明如包拯而多仁恕當時以爲實錄

衛述蒲州人少從薛文清學以躬行爲本景泰庚午舉於鄉授武定州知州剛直清敏及拊循小弱倍極仁慈調莒州毀淫祠興學校修廢舉陞涖任十年代去民咸思之

孟琳蒲州人景泰庚午舉人聰穎厚重從薛文清學得其正傳會試時石亨託鄉誼相延不往除知邳州升淮安同知涖事精敏綽有政聲子汝濬歷官知府汝涖通判希孔進士扶風知縣皆以清節著

劉潔字清之襄垣人舉人端子景泰庚午舉人任廣東道監察御史數上書言事從征荆襄閒運籌決勝功最著遷浙江

副使老成持重洞達機宜雪獄救荒清鹽理漕悉井井有條
理尋卒於官以孫龍貴贈南京吏部尙書所著有一菴集子
鳳儀進士鳳鳴舉人孫龍夔進士

阮勤字必成長子人父河自交趾歸附調長子典史因占籍
焉勤清慎自好登景泰甲戌進士授大理寺左評事轉右遷
寺副出知台州府建鄉賢祠修上蔡書院在台九年遷山東
參政民立祠祀之厯山左右布政使擢右副都御史巡撫陝
西召爲刑部右侍郎轉左未幾調南京屢以老疾乞休未允
考滿晉正二品復乞歸晉階致仕尋有詔起用卒不赴勤敷
厯中外二十餘年剛毅方正始終如一解組後十年卒賜祭
葬如例

龐輔甯鄉縣人景泰丙子舉人知涇陽縣尋改三原有異政

擢知階州持躬清約致仕歸鄉黨重之祀三原名宦

耿裕字好問平定人尙書九疇子也景泰五年進士授庶吉士改戶科給事中轉工科天順初九疇坐劾石亨貶裕亦謫泗州判官後補定州成化初召復檢討進修撰歷國子司業祭酒侯伯幼者肄業監中裕采古諸侯貴戚言行爲書授之上聞而稱善歷吏部左右侍郎代伊旻爲尙書大學士萬安與裕不協而李孜省私其同鄉李裕欲使代裕相與謀中之坐以事奪俸裕入謝上怒其不申謝孜省等因傾之遂調南京禮部孝宗初轉南京兵部參贊機務尋拜禮部尙書先後陳言甚多大指歸於節儉給事中鄭宗仁疏節光祿供應裕請納其奏巡視光祿御史田齋請借太倉銀償行戶裕言疑有侵盜弊請勅禁防從之南京守備中官請增奉先殿品物

裕不可番僧多潛匿京師裕力請驅斥乃留百八十二人餘悉逐之撒馬兒罕及土魯番皆貢獅子甘肅鎮守太監傅德圖形以進巡按陳瑤請卻之裕乞從瑤請而治德違詔罪不從後番使頻有宣召裕言番人僭稱可汗興兵犯順陛下優假其使適遇倔强之時彼將謂天朝畏之益長桀驁且番人狡黠不宜令出入內廷獅子野獸無足珍異卽遣其使還尋代王恕爲吏部尙書加太子太保御用監匠李綸等以內降得官裕疏言故事文官不由推舉傳乞除授者參送法司按治綸不可除用不聽裕領銓政稱平允兩世貴盛而家業蕭然父子並以名德稱卒年六十七贈太保謚文恪

白侃平定人景泰甲戌進士授浙江道監察御史條陳六事憲宗深用采納南京給事中王徽抗疏忤旨侃率同列論救

巡光祿太倉居庸等處所至有水蘂聲按廣東甌珠池因升陝西副使卒於官

延定之平定人景泰癸酉舉人成化閒知陝西甯州以幹濟稱濬修城池屹爲保障邊民賴之遷山東曹州知府

趙文博代州人景泰甲戌進士授御史天順時同張鵬楊瑄等劾石亨曹吉祥下獄擬遣戍尋貶涇化知縣有善政憲宗初擢衛輝知府特賜封誥累遷右副都御史巡撫河南卒

韓文芮城人景泰庚午舉人知新樂縣七年政簡刑清修學除蝗賜勅旌獎升定州知州爲民興利除害政有五端四異士民繪圖頌之擢正定府知府

普暉垣曲人景泰癸酉舉人授白河知縣政聲卓異除虎害民立生祠陞監察御史執法劾奸擢山東按察僉事大臣迭

薦有經濟才將大用尋卒時論惜之

裴泰靈石人景泰丙子舉人授博野知縣行政一本慈恕歲凶諭富民平糶全活者眾修城濬濠民樂趣事升定州知州值王師西征倉卒經理悉有條貫嚴緝盜賊四方甯謐時大同缺饟部檄令定民京倉乞運卽上議紫荊關直抵大同較京師轉運爲便請借州倉如數轉運而以未領京儲準本年秋糧之數免其徵納官民兩便當道聽其議在博野請祀二程在定州改正韓魏公祠其雅重文教類如此入定州名宦

以上景泰年

任義字時中榆次人博通經史尤精于易天順己卯舉人任南陽同知刻剔蠹政殆盡上清軍便宜五事著兵部條例汝鄧饑發粟以賑民至如歸以不附權貴歸講學授徒自號五

雲人稱五雲先生

郝毅榆次人天順己卯舉人授鞏昌府通判剖斷如流勸勵學校以剛正忤時歸屏居別墅五十年不涉城市躬課耕桑自給年逾九十卒

周經字伯常陽曲人瑄子天順四年進士改庶吉士授檢討成化中歷侍讀中允侍東宮講文華大訓太子起立拱聽閣臣議請坐經與諸講官皆不可乃已孝宗立進太常少卿兼侍讀宏治二年擢禮部右侍郎中官請修黃村尼寺奉祀穆穆太后吐魯番貢獅子不由甘肅假道滿剌加經倡僚長毀其寺卻貢不與通謂吏部左侍郎通政經歷沈祿張后姑壻也中官傳旨擢本司參議經言非面承旨又無御札不敢奉詔朝論譴焉靈壽奸民獻地於中官李廣經倡九卿疏爭卒

罪獻地者嘗上言外戚家無功求遷無勞乞賞兼齎進宴
濫費無紀致帑藏殫虛宜大爲樽節又言近例預備倉積粟
多者守令不次遷官遂致剝下干進請如洪武閒例悉出官
帑平糶考績勿專以積粟爲能至清軍之弊宜考故冊洗奸
弊更宜停免薪炭及顏料雜辦此救民急務也上採納之八
年災異陳時政奏草中言斥戲樂上密令中官廉草奏者尙
書耿裕曰疏首吏部裕實具草經曰疏草出經手卽有罪罪
經世兩賢之九年代葉洪爲戶部尙書寬逋緩征裁節冗濫
四方告災必覆奏蠲除每委官監稅課入多者與下考奉御
趙瑄獻雄縣地爲東官莊經劾瑄違制下獄且曰太祖太宗
定制閒田任民開墾若因奸人言而籍之是土田予奪盡出
奸人口小民無以爲生矣卒予民中官何鼎劾外戚張鶴齡

下獄經疏救之忤旨切責雍正王祐檄乞衡州稅課司及衡陽縣河泊所經言不可許納之織造中官請給兩浙鹽課二萬引經言鹽筴佐邊不宜濫給且祖宗朝織染諸局供御有常數不從經恐歲以爲常再疏請斷其後乃命歲予五千引倉場監督多增遣內官經力爭詔止設總督二人京通監督三人內靈臺請撥錦衣餘丁百人經曰祖宗設內臺其地至密今一旦增百人將來必有漏洩妄言者上悟立已之崇王元澤乞河南退灘地二十餘里經言不宜予興王祐杭乞近湖地千三百餘頃經三疏爭之竟不許時賜壽甯侯張鶴齡書甯諸縣地四百餘頃其家人因侵民地三倍鶴齡又奏莊田加徵銀二分經抗章執奏給事中魯昴請盡括稅役金錢輸太倉經曰不節織造賞賚齋醮土木之費乃欲括天下財給

事言非是內官傳旨索錢費二萬兩持不與經剛介方止好
疆諫雖重忤旨不恤宦官貴戚皆憚而疾之會星變自陳乞
休命賜勅馳驛歸加太子太保廷臣爭乞留中外論薦至八
十餘疏武宗初言官復薦召爲南京戶部尙書遭繼母憂三
年召爲禮部尙書固辭不許遣官卽其家起之至郊外復以
疾辭上遣使慰問資玉帶強起受事數日謝病去五年卒年
七十一贈太保諡文端子曾進士浙江右參政

廉政字養民潞州人天順己卯舉人任安邱知縣仁惠著聲
調澠池值歲祲餓殍枕藉悉心拯救復以狀聞得蠲卹全活
萬計時司馬徐賊屬官洛陽貪虐大著監司屬政按訊遂律
其罪或危之日吾甯坐免殃民蠹政所不敢爲竟以獲罪歸
民咸思之

武賢字尙德孝義人貢生有孝行生能盡事沒能盡思天順
間知元氏縣政務簡靖有訟者反覆以理喻之不加刑民競
勸以訟爲戒園扉有宿草焉改知興平縣亦如元氏去任之
日老弱扳轅泣送

楊繼宗字承芳陽城人天順初進士授刑部主事因遇疫時
其食飲令三日一櫛浴全活甚衆河間民張文郭禮送盜逸
文桎梏代盜繼宗辨出之成化初用王翱薦擢嘉興府知府
以一僕自隨署齋蕭然人莫敢犯而時問疾苦祛除之併夏
稅徵於秋糧里役侵漁弊遂絕大興社學子弟八歲不就學
者罰父兄遇學官以賓禮文教大興御史孔儒清軍里老多
撻死繼宗榜曰御史杖人至死者詣府報名因入見曰爲治
有體公但剔奸弊勸懲官吏若比戶稽核則有司非憲體也

儲潁行突入署發篋視之敝衣數襲而已僑慙而去中官過
遺以菱芡厯書中官索錢卽發牒取庫金曰金具在與我印
券中官咋舌不敢受人覲汪直欲見之不可憲宗問直朝覲
官孰廉直對曰天下不愛錢惟楊繼宗一人耳九載秩滿超
遷浙江按察使數忤中官張慶慶兄司禮敏毀繼宗上曰得
非不私一錢之楊繼宗乎敏遣書慶曰善遇之上已知其八
矣聞母喪立出止驛亭盡籍廨中器物付有司惟攜一僕書
數卷而還服闋以右僉都御史巡撫順天奪還莊田侵民業
者按行關塞武備大飭星變陳言厯指中官及文武諸臣貪
殘狀且請召還中官出鎮書治中陳翼許其過權貴因中之
左遷雲南副使孝宗立遷湖廣按察使命汲水百斛滌廳畢
而後視事日吾以除穢也無何復以僉都御史巡撫雲南三

司多舊僚相見歡然既而出位揖之曰明日有公事諸君幸
相諒送劾罷不職者八人未幾卒繼宗剛峭而謙厚爲知府
謁上官朝覲謁吏部必衣繡服曰此朝廷法服也按察浙江
時倉官十餘人坐缺糧繫獄繼宗欲寬之而無由會月俸溢
原數較他司亦然因悟倉吏缺糧之由將其實以聞衆懼請
捐俸代償繫者獲釋嘗監鄉試得二卷具朝服再拜曰二子
當大魁天下吾爲朝廷得人賀及拆卷王華李旻也人服其
鑑天啟初謚貞肅

常顯榆杜人弱冠登天順庚辰進士選庶吉士歷任南京戶
給事中累陞四川巡撫所至皆有惠政嘗具奏請減荒糧正
德六年祀鄉賢

喬鳳字廷儀樂平人毅子少穎敏五六歲從父口授尚書終

卷成誦受業於顧孟喬問學不閒寒暑景泰七年舉於鄉明年天順改元舉進士方十九歲除武選司主事遷員外郎以母憂去服闋還原官進郎中丁父憂起補職方司鳳揭圖座右觀四方山川城堡遠近夷險歷歷在目凡用將校指授方略悉奏効奉使廣西時邊警頗至鳳馳冒暑雨不三月還以過勞染疾卒年止四十有三鳳孝友居喪哀毀撫兄鸞遺孤皆成立和睦姻婭貧乏者時加存恤歲饑出粟賑困子宗尙寶卿字南京禮部尙書並顯於世

鄭冕樂平人舉進士爲御史天順時同張鵬等劾石亨曹吉祥下獄擬遣戍尋貶衡山知縣有善政憲宗初擢衡州知府特賜封誥

雷澤字時霖定襄人天順甲申進士除刑科給事中抗疏陳

戚晚驕恣觸憲廟怒命左右杖之幾斃既甦復申理前說不爲止聞者稱爲鐵漢歷左右都給事中太僕寺少卿值內艱補太僕寺卿遷光祿寺卿澤少遇異人謂之日君事業宏遠第有少厄事急從東南就我可脫也癸未閏中遇火災危甚忽憶前語如其言祝之若有以手攜者遂騰上同舍數人牽其衣皆得免嘗作遇仙傳紀之卒後贈工部右侍郎賜祭葬如例

田益字損之崞縣人性忠孝鯁直不阿勢力由己卯舉人知河南光山縣廉明果斷政稱第一擢監察御史權倖歛跡巡鳳陽政多平反貪污望風解綬升陝西僉事兵備甘州甚有政譽

梁璟字廷美崞縣人天順末進士授兵科給事中成化時

遷都給事中延綬用兵令山西預徵芻粟以供民相率逃太原一縣五日而逃者甚眾環疏陳其困獲寬減又請順天永平二府分設一巡撫以薊州邊務屬之令巡撫陳濂專撫保定六府兼督紫荆諸關從之遂爲定制已請起致仕尙書王竑李秉而斥都御史王越并及宮闈隱事被杖武靖伯趙輔謀典營府事極論其罪乃罷擢陝西左參政分守洮岷西番入寇斬其魁內艱闋還原任歷左右布政使先後在陝十五年多政績孝宗初遷右副都御史巡撫湖廣宏治二年饑請免徵兩京漕糧八十九萬餘石從之提督五當山中官貢黃精梅笋茶芽諸物武當道士至八百道童更倍月給油臘香楮灑掃夫役以千計中官陳喜又令領護持勅皆力請停免外艱除再撫四川七年召拜南京吏部右侍郎久之就進戶

部尙書致仕歸卒

毛深夏縣人天順己卯舉人授山東聊城知縣歷升參政聽訟明決吏民莫能遁情所在多善政民爲建生祠立去思碑後祀名宦有臚菴政錄傳於世

薛璘河津人天順丁丑進士由評事知山東萊州廉明節儉惠利及民期年卒於官民悲號如喪父母先守兗州以萊州守易之兗州民歌曰誰將萊州土來換兗州金其得民愛慕如此

王哲字文明聞喜人天順庚辰進士授行人使浙蜀謝餽遺不受擢監察御史劾邊將劉聚殺山谷民冒首功誅之歷廣平鳳翔徽州知府革日供堂直銀及商引錢徼人有不愛錢之歌遷陝西參政抵陝適歲饑軍餽告匱請於藩司得銀若

于兩易棉花給民令織布折租饒得無缺民亦賴之以濟回
賊圍白水橫甚哲諭以禍福皆羅拜引還孝宗旌內外廉官
名在第四擢浙江右布政未幾以前在秦時巡按與布政相
溝牽連罷歸或傳冢宰語令自辨哲笑謝之遂不復出家甚
貧年七十六歲自爲贊詞卒

王衡字宗銓稷山人資性絕人弱冠登天順甲申進士授清
安知縣屏豪強裁冗費拜浙江道監察御史多所建白出按
遼東陳邊務時宜清理畿甸軍政又陳革弊八事時宜六事
出爲松江知府奏華亭上海災秋糧準納銀布又以舊糧運
至瓜淮每致虧折奏請就支本倉又劾平江伯不戢軍士有
旨約束二運皆停至今賴之又以織造至者多所需索持法
裁之中貴歛跡居官七年清介如一日以內艱去官起補廣

平知府引溢陽河灌田題曰利民間時以農民輸粟予官上疏痛言其弊事隨止升浙江參政轉陝西左布政使減鹽值通商賈邊需以裕奏發帑銀五萬補西安等郡逋負剛直忤時致政歸居第隘陋有司請葺治不許守眞履素不以勢利自多卒年僅五十有四

陶璽字廷用絳州人參議銓第四子天順甲申進士性通敏廉潔初授戶部主事遷員外督德州倉儲先是邾城所輸未足額當事者積其粟於河岸而逮繫其官吏三年猶未結璽至廉得其狀即日釋之自是勸輸恐後終其任無少逋者邾州民田五萬餘頃爲權貴人侵據奉命清查悉得守舊業璽帑金饒遼左榆林軍分給公平負戟之士胥歌舞山陝兩地歲存饑民多流移有司徵逋賦甚亟力請蠲除得免遷郎中

出爲長蘆運使前使藏金署井中求得之悉付還人稱君子
李威靈石人天順壬午舉人授陝西會甯知縣寬仁明恕廉
正有威政理訟平不畏強禦有宦官擾害地方上疏剪除頓
消虐餓調長安興利除害吏畏民懷竭誠禱雨輒獲甘霖人
甚德之以上天順年

右明洪武至天順一百一十八人

山西通志卷一百二十八